

*L'Ordinario di Madrid-Alcalá, mons. Leopoldo Eijo y Garay, erige con apposito decreto la Società sacerdotale della Santa Croce in società clericale di vita comune senza voti pubblici.*

### *Decretum*

Quindecim abhinc annos pius ac zelans hujus Matriten. Diocesis Sacerdos (1), Doctor D. Joseph Maria Escrivá de Balaguer et Albás, favente ac benedicente Ordinario Diocesano, Institutionem condidit, cujus sodales, praeter propriam cujusque sanctificationem, servatis Evangelii consiliis in munere professionali exercendo obtinendam, hunc, quamvis non unicum, specificum finem sibi proposuerunt: enixe adlaborare ut selectam partem virorum professionum intellectualium, quibus natura competit societatem civilem dirigere, ad fidei catholicae principia revocarent et ad Evangelicam perfectionem suaderent.

Novam hanc Institutionem — quae, ob singularem et propriam consociationem *Opus Dei* appellata, proprium finem omni contentione est ubique prosecuta — apprime temporum nostrorum et nostrae Patriae necessitatibus urgentissimis respondere nemini non apparuit. Omnes enim fatentur, rei publicae eversionem, quae universam fere Hispaniam nuper cruentavit, desertioni a doctrina et praeceptis Christi hominum « intellectualium » esse magna ex parte adstruendam, quippe qui doctrinis dissolventibus per tot lustra juventam studiosam inquinarent.

Cui pia Institutioni divinus favor jam inde a primordiis constans adfuit, sese praecipue manifestans tum numero et qualitate ad eandem advolantium juvenum integritate aequae ac ingenio florentium, tum fructibus uberrimis ubivis ab eadem collectis, tum denique signo contradictionis, quae operum Dei sigillum exstitit. At vero, succrescentibus in dies Institutionis membris, ejusdemque mirum in modum extenso activitatis ambitu, visum est, scopum, constitutionem et methodum actionis intra fines simplicis Associationis ulterius contineri non posse, sed ampliorem et firmiorem exigere rationem verae Societatis Ecclesiasticae legitime erectae et constitutae. Sic enim, dum diversae Institutionis activitates organice coordinabuntur, ipsa Hierarchiae intimius haerebit, necessariam internam aethoniam comparabit et firmitatem sanctionis nedum Ordinarii loci verum etiam Sedis Apostolicae nanciscetur.

Re igitur mature perpensa, pro Nostro officio, universum negotium ad Apostolicam Sedem retulimus, a qua, per S. Congregationem de Religiosis, telegrapho prius, dein vero litteris authenticis die 11 octobris 1943, sub num. 2.777/43, responsum accepimus, nihil ab eadem Sede Apostolica obstare quominus ad optatam erectionem canonicam praedictae piae Associationis de-veniremus.

Quapropter, facultatibus cc. 674, 492, § 1 concessis utentes, laudatam piam hucusque Associationem a Nobis ut talem jam antea adprobatam in veram Societatem juris Dioecesani ad normam t. XVII l. II. Codicis Juris Canonici erigimus atque constituimus sub nomine *Societatis Sacerdotalis Sanctae Crucis*, in finem compendio Statutorum Sanctae Sedi submisso sat expressum et mediis ibidem relatis obtinendum. Haec autem Societas Sacerdotalis Sanctae Crucis erit ad normam juris communis Nobis Nostrisque Successoribus plane subjecta (c. 492, § 2). Ut vero efficacius intentos effectus Societas consequatur, volumus ac edicimus ut, firmo compendio Statutorum Sanctae Sedi, ut diximus, delato, ejusdem Societatis ampliores et completiores Constitutiones exarentur Nostrae approbationi subjiciendae.

Hujus decreti canonicae erectionis Societatis Sacerdotalis Sanctae Crucis, manu Nostra subscripti Nostroque sigillo muniti, tria exscribantur exemplaria: primum ad Sedem Apostolicam remittendum, alterum Rv.do Moderatori Societatis tradendum, tertium denique in Archivo Curiae Episcopalis ad perpetuam rei memoriam asservandum.

Matriti, in die festo Immaculae Conceptionis B. V. M., 8 decembris 1943.

† Leopoldus, Episcopus Matriten-Compluten.

J. Marco, *Cancell.*

Locus sigilli.

Il decreto venne dapprima pubblicato nel *Boletín oficial del Obispado de Madrid-Alcalá*, numero del 15.4.1944, pp. 170-171, e da qui ripreso e nuovamente edito nella *Ilustración del clero* 37 (1944) 201-203, con una breve introduzione in cui si precisava che il fine del nuovo istituto è « la santificación propia de sus individuos por el trabajo y actividad profesional, para más beneficiosamente influir en la sociedad, aspirando a que los llamados « intelectuales » conozcan mejor y vivan la doctrina de Jesucristo ». Esso venne poi inserito da X. Ochoa nella sua raccolta delle *Leges Ecclesiae*, n° 1780, ma erroneamente presentato come decreto di erezione in istituto secolare (cf. *Leges Ecclesiae*, indici, IV, Roma 1974, \*146). Infine, nuovamente pubblicato, insieme ad altri documenti, dal *Commentarium pro religiosis* 64 (1983) 342-344, in occasione della trasformazione dell'*Opus Dei* in prelatura personale. Il testo qui pubblicato è stato controllato su un originale gentilmente inviato dalla Curia arcivescovile di Madrid-Alcalá.

(1) Si noti che Escrivá de Balaguer viene qui presentato come un sacerdote della diocesi di Madrid. E la prima volta che ciò ricorre in un documento ufficiale.